

Guijtz Ganid Ni Bacuaa Pabl Lo Guidoo Xten Guedx Corinto

Bacuaa Pabl te guijtz lo guidoo xten guedx Corinto

¹ Narä Pabl nacä apost xten Jesucrist sa'csi agule Dios narä te gusule'ä xtiidxni. Narä näjza Sóstenes ni najc bejtznu lo xtidx Dios rucuaanu guijszre lojtu ² ni ahuililajz xtidx Dios, ni yu' neñ guidoo xten guedx Corinto. La'tu agule Jesucrist, abasiani lastootu sa'csi ahuililajztu xtiidxni. La'tu näjza guiraa rebejn ni ahuililajz rextidx Jesucrist loj guideb guedxliuj, najctu xpejn Dios, ni najc Dad xten guiraanu. ³ Rniabnu lo Dios ni najc xtadnu näjza lo Dad Jesucrist, gacnäjreni la'tu, guscuecdxireni lajztu.

Abaniidx Dios xhidajl dzunsa'c xcuent Jesucrist

⁴ Rudedätis xquixtios lo Dios xcuentu, xcuent yälru-laslajz xten Dios ni cua'tu xcuent Jesucrist, ⁵ te xcuentni acua'zatu guiraa dzunsa'c, te gusule'tu xtiidxni, näjza te gacbesa'ctu xtiidxni; ⁶ sigajcza con xcäl'nabansa'ctu baluiitu huililajzfactu xtidx Dios xcuent Crist. ⁷ Ni'cni xhetliidi cayäädxditu loj redzunsa'c ni runiidx Dios, laj ni ganduxh yu'tu cabäjztu guibisac Jesucrist lo guedxliuj. ⁸ Laani susutijpni lajztu dxejli ni guibisac Dad Jesucrist loj guedxliuj, te rutliidi gac cue'c xhi te quej xcuenttu. ⁹ Rusoobpac Dios xtiidxni. Laani gurejdxni la'tu te jiu'tu lo xnejz Xi'nni Jesucrist ni najc Dad xtenu, te sanäjtoni.

Rlia' sa'reni neñ guidoo

¹⁰ Rulidxä la'tu, rebetzä, xcuent Xtad Jesucristnu, colyejn tejsi xhigab te na'c la' sa'tu, saru guibannäjtu sa'tu, colyejn tejsi xhigab, colga'p tejsi xcäriejn. ¹¹ Sa'csi agucbeä xcuenttu, betzä ni huililajz xtidx Dios. Tej resa'

Cloé biädsä'n diidx loä xcuenttu, yu' yälrdijl lojtu. ¹² Rlazä guiniä scree lojtu sa'csi yu'reni rnii: “Narä nacä te rexpejn Pabl”, näjza: “Narä nacä te rexpejn Apolos”; näjza: “Narä nacä te rexpejn Pedr”, yu'zareni rnii: “Narä nacä xpejn Crist.” ¹³ ¿La rujntu xhigab nala' sa' Crist, ä? ¿La cuaj Pabl lo cruzj xcuent xtojltu, ä? o ¿La gurobnistu con laj Pabl, ä? ¹⁴ Rudedä xquixtios lo Dios dina nutiobnisä nicla tejtu, xtebtis Crispo näjza Gayo, ¹⁵ te rut naadi con laä batiobnisäreni. ¹⁶ Abanaj lazä batiobnisä resa' Estéfanas. Di lazä guinaj la yu' chu stee bationnisä. ¹⁷ Di Crist nuxhal narä te gutiobnisä. Baxhalni narä te gusule'ä rextiidxni xcuent xho gun bejn te laareni lo dojl, xhet con didxnanduxhdi, te di gudzucaä loj dzunroduxh ni bejn Jesucrist che gujtni lo cruzj.

Crist najc xcälmilaagwr näjza xcälnajn Dios

¹⁸ Rediidx ni rniinu xcuent Jesucrist xcuent xho gujtni lo cruzj te guslaani rebejn lo dojl najcni te diidx ni xhet sajcdi lo rebejn ni canijt sa'csi direni chalilajz xtiidxni. Luxh loj rebejn ni ruslaa Dios lo dojl najc rediidxga xcälmilaagwr Dios. ¹⁹ Scree caj loj rexquijtz Dios:

Narä sutzulä yälnasin xten rebenajn,
sudzucaäza xcälnadxällajz, xhigab rebejn ni nadxällaz-
duxh.

²⁰ ¿Con bejn ni nanduxh? ¿Con bejn ni rucuaa, ni najc maestr? ¿Con bejn ni ruchagduxh diidx xcuent recos guedxliujre, ä? ¿La et abejndi Dios najc guiraa yälnasin xten guedxliuj si'c nayällajz nez loj Dios, ä? ²¹ Ni'cni loj xcälnasin Dios, di rebejn guedxliuj niembee Dios con xcälnasin guedxliujre, ni'c bichagljaz Dios con yälrusule' diidx ni rniireni nayällajz, con ni'c baslaani lo dojl rebejn ni huililajz xtiidxni xcuent Crist.

²² Rexpejn Israel rlanjpacreni fiireni remilaagwr; rebejn griegw rguuil yälmanduxh. ²³ Niluxh nuurnu rusule'nu diidx xcuent xho cuaj Jesucrist lo cruzj, niluxh loj rexpejn Israel najc diidxre si'c te guiro ni chalani' bejn, luxh loj rebenzijt xhet sajcdi rediidxre. ²⁴ Niluxh loj rebejn ni gule Dios chalilajz rediidxre, rexpejn Israel sigajc loj rebenzijt, rediidxre najczani yälmlaagwr najczani yälnasiñ xten Dios. ²⁵ Sa'csi xcälñayääl xten Dios si'c rchalo rebejn ni'c najc nasinduxhru loj xcälñasiñ xten reben guedxliuj; luxh xcälñiaj xten Dios sacduxhruni loj guiraa xcälñadaan reben guedxliuj. ²⁶ Colhunii la'tu, betzä ni ahuililajz xtidx Dios, xho gule Dios la'tu, colyejn xhigab guxiitu najctu ben nasiñ loj reben guedxliuj, guxiiza rajptu yälñibee, guxiizatu najctu bejn ni agojl guiga'tu bensa'c. ²⁷ Niluxh agule Dios rebejn ni xhet nanduxhdi te gusanxtujyni rebejn ni nanduxh, aguleza Dios rebejn ni guxii rnibee te gusanxtujyni rebejn ni rnibeduxh. ²⁸ Agule Dios rebejn ni di guiga' benro, näjza rebejn ni rut riudi, reni rut najcdi, te gusanxtujyni rebejn nani najc guiraa reni'c. ²⁹ Te nicla tej bejn digacdi guiliä'p lagajc xpala'nni nez loj Dios. ³⁰ Lagajc Dios abachaag la'tu loj Dad Jesucrist; baxhalzani Jesucrist loonu te basanijni xcäriejnnu te ga'pnu yälñasiñ xten Dios, te guibansa'cnu nez loj Dios, te gacnaya lastoonu, näjza te quiixni rextojlñu. ³¹ Si'c bejn Dios te soob xtiidxni cadro caj scree:

Ni rlanj guinii didxro, suguiliä'pni xpala'n dzuun ni bejn Jesucrist.

2

Rediidx xcuent Crist ni cuaj lo cruzj

¹ Ni'cni cheni biädsule'ä xtidxlii Dios lojtu, rebetzä, dina niädniä didxnajn lojtu, niclaza didxnagajn, xhet si'cti basule'ä xtidx Dios xcuent Crist. ² Cheni guyu'ä lojtu,

benä xhigab dina niädniä xhi stee diidx lojtu, biädsule'ätis diidx xcuent Dad Jesucrist, ni cuaj lo cruzj. ³ Bidzunä lojtu guideb rdxagä, guideb racditä sa'csi cadxebduxhä. ⁴ Cheni basule'ä diidx lojtu, dina niniä didxro xten yäl^unasin^u xten guedxliuj, alga guniä xtiidx yäl^unasin^u xten Sprit D^uxan xten Dios näjza xcäl^urnibee Dios, ⁵ te di gac xcäl^ur^ulilajz^utu xcuent yäl^unasin^u xten guedxliujre, te gac xcäl^ur^ulilajz^utu xcuent yäl^urnibee xten Dios.

Rumbee bejn Dios xcuent ni rului Sprit D^uxan xten Dios

⁶ Rniizanu lo sa'nu ni aguyajl lo xtidx Dios rediidx xten yäl^unasin^u xten Dios, per te yäl^unasin^u ni di gac xcäl^unasin^udi guedxliuj, niclaza xten reni rnibee lo guedxliujre, sa'csi sidzuj^u dxej sinitlojreni. ⁷ Niluxh che rniinu yäl^unasin^u xten Dios, rniinu diidx ni rut racbextebdi, xcuent xho gac guidzun^unu cadro yu' Dios xhaguibaa. Cheni gajdli gac guedxliuj, rapcheeni yäl^unasin^uxhiga'tz xtenni. Baluiinini loonu te guibannäänuni lo xcäl^urdimbicha' xtenni. ⁸ Nicla tej reni rnibee lo guedxliujre gajd gacbee recosre niluxh paru niacbeerenini, direni nucuaa lo cruzj Dad Jesucrist nani rajp xcäl^urdimbichaduxh. ⁹ Najcni si'cni caj lo rextidx Dios cadro rnii:

Recos ni gajdpac baloj bejn fii,

nani gajdpacza diajg bejn jiejn;

nani gajdpacza jiu' lo xhigab bejn, guiraa recosga abaluchee Dios par rebejn ni chanälajzni.

¹⁰ Niluxh abaluii Diosreni loonu con Sprit D^uxan xten Dios, sa'csi laani basule'nireni loonu. Sprit D^uxan xten Dios racbesa'c guiraa rexhigab, näjza recos xhiga'tz xten Dios.

¹¹ Loj reben^u guedxliuj ¿chuni'c racbee rexhigab ni rujn bejn? Lagajc sprit xten bejn ni yu' nenni racbee xhi xhigab cayujnni. Sigajcza rut racbeedi rexhigab xten Dios; Sprit D^uxantis xten Dios racbeeni. ¹² Luxh nuurnu dinu

nica' yäl̄najn xten guedxliuj, alga cua'nu Sprit D_{xan} ni siääd lo Dios te gacbeenu rexicos ni abasalajz Dios loonu. ¹³ Nuurnu rniizanu xcuent recosga, xhet diidxd̄i ni ruluii xcäl̄najn guedxliujre, diidxtis ni baluii Sprit D_{xan} xten Dios loonu. Si'c ruluiinu rediidxga loj rebejn̄ ni rbäjz Sprit D_{xan} xten Dios neñ̄ lastooreni.

¹⁴ Niluxh reni di chalilajz xtidx Dios, direni gacbee rehxigab xten Sprit D_{xan} xten Dios, sa'csi laareni xhigabyäältis rchaloreni xcäl̄nasiñ̄ Dios. Di gacdiza gabeereni rehxigabga, sa'csi Sprit D_{xan} xten Diostis rajc ruluii lo bejn̄ rehxigab xtenni. ¹⁵ Rebejn̄ ni ahuililajz xtidx Dios, rula'tzreni guira'ti ni ruluii Sprit D_{xan} xten Dios lojreni. Luxh rebejn̄ ni ahuililajz rutliidi rula'tzdireni. ¹⁶ Sa'csi scree caj lo xtidx Dios: “¿Chuni'c agucbee xho najc xhigab xten Dios te gac guluiini Gueb Dios, ä?” Nicla tej bejn̄. Niluxh nuurnu rajpnu lo xcäriejn̄nu xhigab xten Crist, nalajznu racbeenu rextiidxni.

3

Reni rujn̄ dzuun lo Dios

¹ Rebetzä, di niajcdi niniä redidxnagajn lojtu si'c ni rniä loj rebejn̄ ni rajp yäl̄nasiñ̄ xten Sprit D_{xan} xten Dios, basule'ä ganaxtis didx guyasi lojtu, sa'csi najctu beñ̄ guedxliuj o biuxbäz ni guxii racbeeni xcuent Crist. ² Basule'ä ganax didxguyasi lojtu si'c rudeed bejn̄ le'ch lo te biuxbäz lacuaa gauni bääl. Dina niniä lojtu guiraa rextidx Dios ni nanab gacbeetu, sa'csi gajd gacdi gacbeetuni, niclaza naj gajd gacdi gacbeetuni, ³ sa'csi nabañsijctu si'c nabajn̄ rebeñ̄ guedxliuj lałtis runembiidtu, rdxechlajztu lo sa'tu, ¿la ditu gacbee nacsijctu si'c beñ̄ guedxliuj, ä? ¿La lałtis nabajn̄tu si'c nabajn̄ rebeñ̄ guedxliuj ni di gumbee xtidx Dios, ä? ⁴ Sa'csi cheni rnii tejni: “Narä nacä te xpejn̄

Pabl”, dxejcti steeni rnii: “Narä nacä te xpejn Apolos”, ¿la xhet cayujnditu sigajctis ni rujn rebejn guedxliuj, ä?

⁵ ¿Chuni'c najc Pabl? ¿Chuni'c najc Apolos? Nuurnu najctisnu xmos Dios ni basule' xtidx Dios lojtu te huilila-jztu, luxh cade tejnu riennu dzuun ni runiidx Dios jiennu. ⁶ Ganid basule'ä xtidx Dios lojtu, dxejc biääd Apolos te gucnäjzani gucbeerutu xtidx Dios, niluxh lagajc Dios najc ni cagusanij xcäriejntu te gacbesa'ctu xtiidxni. ⁷ Ni'cni nicla ni rusulexgaa diidx, niclaza nani racnä j racbeeru bejn rediidxga xhet sajcdireni; Diostis sajc nani rusanij xcäriejn rebejn. ⁸ Nuurnu najcnu si'c rexmos ni rujn dzuun lo yuj. Tejsi najc nani rbe'c binij näjza nani rga' nis, niluxh Dios rguixj tejganu dzuun nani riennu. ⁹ Nuurnu najcnu si'c remos ni runnä j Dios dzuun. La'tu najctu si'c yuj cadre cayajc xtzun Dios, si'c te yu' ni cayunchee Dios. ¹⁰ Narä nacä si'c te mastr albañil. Baniidx Dios dzuun loä, gucnäjni narä te casuä reguij lo yujre, te naj ste'ca bejn quixh basuu yejcti. Niluxh tejga ni chanuu gun dzuun lojga, suga'pni cuidaad xho guiliäsni padeerga. ¹¹ Sa'csi di gacdi gusujreni garenca cimient loj nani najc-xgaa, ni najc Jesucrist. ¹² Naj palga guiliäs bejn te padeer yejc cimientga con oor, con pla't, con guij ni sacduxh, o con baräjd, guixhtriuu, o balag biquii, ¹³ sidzujn dxej sien xho najc dzuun ni bejn tejga bejn. Sa'csi siääd fis guiboo ni guluiloj dzuunga, sa'csi lagajc guibooga guluiloj dzuunga, xho najcti. ¹⁴ Palga yu' reni bejn te yusa'c yejc cimientga, luxh dini chec lo guibooga, sudeed Dios lo bejn ga ni riäj j xca'ni sa'csi bejn ni yusa'c. ¹⁵ Niluxh palga chec ni bejn ni yejc cimientga xhet xca' dini, xcäl nabajntisni di nit, luxh xtzuunni sejc.

¹⁶ ¿La ditu gan la'tu najctu xquidoo Dios, luxh nen lastootu rbäjz Sprit Dxan xten Dios, ä? ¹⁷ Palga yu' chu gutiexhät xquidoo Dios, sunitloj Diosni par tejpas, sa'csi

xquidoo Dios najc dxan, luxh la'tu najctu guidooqa.

¹⁸ Nicla tejtü na'c gusgueetu lagajc la'tu. Palga yu' chu rujn xhigab nanduxhni xcuent yäl_nasiñ xten guedxliujre, nanabpac gacni si'c te bejn ni xhet najndi te xca'ni yäl_nasiñ xten Dios te guliipac gacni te bennajn, te beñ nasiñ. ¹⁹ Sa'csi yäl_nasiñ xten guedxliuj xhet sajcdi nez loj Dios. Lo rexquijt_z Dios caj scree: “Dios rujn rga' reni rajp yäl_nasiñ xten guedxliuj lagajc xcuent xcäl_rrusgueereni ni rujn lagajc xcäl_nad_xäl_lajzreni.” ²⁰ Ste'ca lajt caj scree: “Nanchee Dios xho najc xhigab ni rujn rebejn ni rajp xcäl_nasiñ guedxliujre, luxh xhetliidi sajcdi nez loj Dios.” ²¹ Ni'cni na'c guiliä'p bejn xpala'n te bejn guedxliuj. Sa'csi loj tejpgatu abaniid_x Dios guira'ti rexhicos najc xtengatu, ²² palga najcni Pabl, o Apolos, o Pedr, o guedxliuj, o yäl_nabajn, o yäl_gujt, o recos ni yu' naj, o recos ni churu gac, guiraareni najc xtentu. ²³ La'tu najctu xten Crist, luxh Crist najc Xi'n Dios.

4

Xtzuun reapost

¹ Ni'cni la'tu nanab fiitu loonu si'c rexmos Dad Jesucrist ni rajp rexhigabxhiga'tz xten Dios te gusule'nureni lojtu. ² Mbaj pues, te bejn ni cahuii te dzuun nanab gusoobreni diid_x, gunreni te dzunsa'c. ³ Niluxh guxii runä xhigab gula'tztu narä, o gula'tz chutis guxhtis lo guedxliujre narä; nicla lagajc narä dina gunduxhä xhigab xho nacä nez loj Dios. ⁴ Entis rbedxi xcärienä, per xhet xcuent ni'cdi sajcdi guiniä xheti xtolä, Dad Jesucrist najc nani rula'tz narä, rhuilojni xho nacä. ⁵ Ni'cni la'tu na'c gucuaquijtu bejn che gajd guidzujñ dxej; colcuäjz jääd Jesucrist dxejc laani sibääni lo bianij guiralii ni naga'tz lo nacäy, luxh suluilozani xhi xhigab yu' nen lastoo tejga rebejn, dxejc lo tejganu sudeed Dios ni nungäj_l xca'nu.

⁶ Rebetzä, xcäl'nasa'ctu caniä rediidxre lojtu. Caniä xcuent Apolos näjza narä, si'c te yäl'ruluii te fiitu xho riennu te na'cza guntu recos ni xhet caj di lo rexquijtz Dios, te na'cza guiliä'ptu xpala'n tejtü lo resa'tu, laḷ ni cabälaztu steeni. ⁷ Sa'csi ḷchuni'c rnii najclu beḅsa'cru lo ste'ca bejḅ?, o ḷxhini'c rajplu ni di Dios nuniidx lojlu? Luxh palga cuaxlia'luni, ḷxhicuent lagajc luj rliä'plu xpala'ntu, lascanu rut baniidxdi lojlu recos ni rajplu?

⁸ Rujntu xhigab rajptu xhidajl cos, naatu najctu ricw-duxh, rchalotu najctu rei, dirutu guiquiin nuurnu. Malaii gului najcpactu rei te näjzanu guinibenäjnu la'tu. ⁹ Niluxh runä xhigab gule Dios reapost si'c rebejḅ ni xhet sajcdi. Najcnu si'c rebejḅ ni gunibeereni guet. Nez loj rebeḅ guedxliuj näjza nez loj rexangl Dios najcnu si'c rebeḅ ni rdedlojtis bejḅ lojreni. ¹⁰ Nuurnu najcnu beḅnayääl xcuent Crist, niluxh la'tu rchalotu racbeduxhtu rextidx Crist. Nuurnu najcnu bejḅ ni xhet nadipdi, niluxh la'tu najc beḅdanduxh. Rliä'p rebejḅ xpala'ntu, ni'c rbälazreni nuurnu. ¹¹ Cadeednu trabajwduxh ḅaj, rliaanu, riojlnu, xho rniaj xhajbnu, rdiḷnäj rebejḅ nuurnu, luxh xheti roliznu. ¹² Rdxaggu riennu dzuun lagajc ḅaanu te guidxälnu xhi guidaunu. Che rguereni loonu, rniabnu lo Dios xcuentreni. Che rusacsí rebejḅ nuurnu, rientisnu huant. ¹³ Che rniyajreni nuurnu, rulidxnäänureni didx-doo. Rujnreni xhigab najcnu si'c guijxh xten guedxliujre, ruhuiireni loonu si'cni xhet sajcdinu.

¹⁴ Dina gucuaä rediidxre te gusanxtuiyätu. Rucuaä rediidxre te gulidxätu si'c rexi'nä ni sanälazä. ¹⁵ Palga ga'ptu tzuu miḷ bejḅ ni guluiitu rediidx xten Crist, ruti stee xtadtu; narä gucä xtadtu, ganid narä basule'ä rextidx Dios lojtu. ¹⁶ Ni'cni rulidxä la'tu, colyejn si'cni ruhuiitu runä.

¹⁷ Ni'cni baxhaḷä Timoteu lojtu, najcni si'c xi'nä ni

sanälazä, ni rusooḅ diidx xcuent Crist. Laani susnajni lajztu xho mood nabaḅä lo yälḅabajḅ xten Jesucrist, sigajcni ruluiä neḅ reguidoo guiraasi lajt. ¹⁸ Yu'tu ni acayajc gualajz, naatu pet dina guibisacä lojtu. ¹⁹ Cabäzä jiädhuiätu, palga si'c rlajz Dios, dxejc sacbeä chuni'c najc rebejḅ ni cayajc gualajz, fiä xhipacni rujnreni, xhet xtiidxtisreni gacbeä. ²⁰ Sa'csi xcälḅnibee Dios xhet ganax-tis xcuent diidx najcni, näjza dzuun ni rujnreni ruluiloj xcälḅnibee Sprit Dxan xten Dios ni rajpreni. ²¹ ¿Xho rlajzzatu guidzuna lojtu, ä? ¿La sidzuna si'c te dad ni ca' te baar te quinätu o la guidzunää yälḅinälajz näjza yälḅadolajz te gulidxätu, ä?

5

Xho nanab gunnäjtu te bejḅ ni rujn falt lo sa'ni

¹ Aguceä yu' tejtḅ ni ahuililajz xtidx Dios, cua'ni si'c chäälḅni te gunaa ni gujc chääl xtadni. Dee najc te doḅduxh nani nicla reni di chalilajz xtidx Dios direni gun. ² Luxh la'tu gujctḅ gualajz lacuaa niac-huin lastootḅ; te bejḅ nani bejḅ doḅḅga, riäjḅ niḅääḅtuni nez lojtu. ³ Mase ruti narä ro'c, lastoä suganäj la'tu. Alabenä xhigab xhini'c jiennäjnu bejḅga ni bejḅ doḅduxhga, sigajc ni niunä paru suga'ä ro'c. ⁴ Con laj Dad Jesucrist, che abidxagsa'tu, luxh alastoä suganäj la'tu, con xcälḅnibee Dad Jesucrist, ⁵ abenä xhigab guteednu bejḅga ladzḅnaa beḅdxab te ted tiejxhni trabajw, niluxh sprit xtenni laani neḅ dxej ni jiädsac Dad Jesucrist lo guedxliujre.

⁶ Di guchaag guiliä'ptḅ xpala'ntu xcuent dzuun ni ru-jntu. ¿La ditḅ gan te doḅḅ najc si'c tudxe'n cojb ni ruslaj, rusaguijḅni cojb cadro ru'chni, ä? ⁷ Colḅgudzucaj cobyu-jxhga, te guibajḅntu te yälḅabannayacoob si'c te cobyä, sa'ni racchee yätxtiil ni xheti levaduur yejcni par lanij

xten pascw. Arajptu yälⁿabannaya sa'csi agujt Jesucrist sigajc gujt te xile' lo lanij pascw te badzucajni rextojlⁿnu. ⁸ Si'c nanab jiennu lanij xten pascw con yätxtiil ni xheti levaduur yejcni, nalajznu con yälⁿguliipac nen lastoonu, xhet yätxtiildi ni yu' cobyujxhga yejcni, nalajznu na'c gunlu latsiaj.

⁹ Lo stee guijtⁿ abacuaä lojtu, na'c guchaagtu rebenⁿ ni runnäj cosguijdx bejnⁿ ni di gac chäälreni. ¹⁰ Niluxh xhet caniädi xcuent rebenⁿ guedxliuj ni rujn cosguijdx con bejnⁿ ni di gac chäälreni, niclaza xcuentdi rebejnⁿ ni rchaglaztej meel, niclaza rebejnⁿ ni najc gubaan, niclaza rebejnⁿ ni riu rebanäjb. Paru si'c gacni, nanab jiunejztu guedxliujre. ¹¹ Niluxh narä bacuaä guijtⁿzga lojtu te na'c guchagsa'tu te bejnⁿ nani rnii ahuililajzni xtidx Dios, luxh rujnruni cosguijdx con bejnⁿ ni di gac chäälⁿi, o rchaglaztejni meel, o riuni rebanäjb, o rniyaj sa'ni, o rsiojzni, o rusgueeni bejnⁿ te rca'ni xhi xtenni. Rniäza lojtu, nicla gaunäjtu sa' bejnⁿga. ¹²⁻¹³ Sa'csi narä di gacdi gunä yälⁿguxhtis loj rebejnⁿ ni gajd chalilajz xtidx Dios. Gunti Dios yälⁿguxhtis lojreni. La'tu nungäjⁿl guntu yälⁿguxhtis loj rebejnⁿ ni ahuililajz xtidx Dios. Ni'cni colⁿgudzucaj beⁿdojⁿlga lojtu.

6

Na'c chäätu loj rebeⁿdojⁿl te gunreni yälⁿguxhtis lojtu

¹ Palga tejtⁿ ni ahuililajz xtidx Dios rlajz cue'c xquej stee sa'tu, ¿xhicuent chale'ctu xquejni loj rebeⁿdojⁿl te gunreni yälⁿguxhtis lojtu? ¿Xhicuent ditu guiniab yälⁿguxhtis loj rebejnⁿ ni ahuililajz xtidx Dios, ä? ² ¿La ditu gan, rebejnⁿ ni ahuililajz xtidx Dios sujⁿ yälⁿguxhtis lo rebenⁿ guedxliuj, ä? Palga la'tu sujⁿtu yälⁿguxhtis lo rebenⁿ guedxliuj, ¿la di gacdi guntu yälⁿguxhtis lo sa'tu lo recosbäz lacuaa chäätu loj rebeⁿdojⁿl te gunreni xcälⁿguxhtisreni lojtu, ä? ³ ¿La ditu gan sienzanu yälⁿguxhtis lo rexangl

Dios, ä? ¡Aticaxh jiennu yälguxhtis loj recos bäze' xten sa'nu lo yäl_nabaj_nre! ⁴ Palga la'tu cadil_näj sa'tu xcuent recos xten guedxliujre, ¿xho mood chäälu loj rebendoj_l ni rut najcdi loj xquidootu, te naareni lojtu xhini'c guntu, ä? ⁵ Rniä rediidxga lojtu te guitujy_{tu}. ¿La ruti nicla tej bennasi_n loj guiraatu ni sajc gun yälguxhtis lo resa'tu, ä? ⁶ ¿Xhicuent rile'c te bej_n ni rililajz xtidx Dios xquej bejtzni ni rililajz_{za}, luxh rijreni nez loj reguxhtis ni di chalilajz xtidx Dios?

⁷ Mbaj naj, guliipacni alabanijttu sa'csi yu' yälrdil_näj sa'tu; colgutijp lajz_{tu} rebej_n ni rujn doj_l lojtu. Maazru huen colgusaan sucua'reni xhixtentu. ⁸ Per dee, alga lagajc la'tu runnijttu loj lagajc resa'tu, luxh rca'tu xhixten lagajc resa'tu.

⁹ O ¿la ditu gan reben doj_l dipacreni jiu' lo xcäl_nr_nibee Dios, ä? Na'c gusaantu gusgueereni la'tu; nicla te resa' dee di jiu' lo xcäl_nr_nibee Dios: guiraa reni richagtoo regunaa; guiraa reni raj_n rebanäjb; reni resnä j bej_n ni di gac chäälni; reniguii ni rungunaa; reni najc birääx; ¹⁰ reni najc gubaan; reni rsiäblajz xhixten bej_n; reni rsiojz; reni rniyaj; reni rusguee bej_n te rca'reni xmeel bej_n. Nicla tej sa' redee di jiu' lo xcäl_nr_nibee Dios. ¹¹ Yu'zatu ni gujc si'c galoo, niluxh naj abasia Dios lastootu, naj anajctu bennaya nez loj Dios sa'csi abiäl_lajz Dios xtoj_ltu xcuent Jesucrist, näjza xcuent Sprit Dxan xtenni. La'tu anajctu rexpej_nni.

Tiejxhnu najc xquidoo Dios

¹² Guliini sajc gunä xhitis ni rlazä gunä, niluxh xhet guiraadini najc hueen par narä. Narä sajc gunä si'ctis ni rlazä, niluxh dina gusanä guinibee nicla tej xhi cos narä. ¹³ Guliini najc yälrajw par xque'ni, luxh xque'ni najc par yälrajw, niluxh sidzuj_n dxej sunitloj Dios guiro'preni. Per tiejxhnu di gac par jiennu cosguijdx con bej_n ni di gac

chäälnu. Tiejxhnu najc par Dios, luxh Dios najcza par tiejxhnu. ¹⁴ Luxh naj lagajc Dios guläs Dad Jesucrist lo rebengut, siliäsžani nuurnu con xcälrnibeduxhni.

¹⁵ ¿La ditu gan tejgatu najc si'c te la' tiejxh Crist sa'csi ahuililajztu rextiidxni, ä? Palga tiejxhnu najc xten Crist, ¿la sajc gudeednuni loj te gunadxab, ä? ¿Gurniälojlu jiennu si'c! ¹⁶ ¿La ditu gan cheni guchaagni te gunadxab rajcni tejtis tiejxh con laani, ä? Loj rexquijtz Dios caj: "Guio'preni sajc si'c tejtis bejn." ¹⁷ Niluxh nani rudeed lastooni lo Dios anajczani tejtis con laani sa'csi rbäjz Sprit Dxaan xten Dios nen lastooni.

¹⁸ Colguibicaj lo dojl ni rujn bejn con nani di gac chäälni. Xhitis stee dojl ni rujn bejn najcni lo jiaa tiejxhni, niluxh dojl ni runnäjni bejn ni di gac chäälni najc dojl lagajc nen tiejxhni. ¹⁹ O ¿la ditu gacbee tiejxhtu najc xquidoo Sprit Dxaan ni abaniidx Dios te cuääžni nen lastoonu, ä? Ni'cni di gacdi guinibeetu lagajc la'tu. ²⁰ Agudijx Jesucrist xtojlnu con xtiejnni lo cruzj, ni'cni nanab jiennu dzunsa'c nani guiliä'p xpala'n Dios con tiejxhnu näjza Xpirtnu.

7

Yälrujidx xcuent yälruchnaa

¹ Naj gudzu'ä diidx lojtu xcuent ni gunabdiidxtu cheni bacuaatu guijtz loä. Guliini hueen najcni na'c guchnaa te niguii. ² Niluxh sa'csi yu' xhidajl reni richunäj chutis gunaa, suga'p tejga reniguii chäälpacni; sigajcza suga'p tejga regunaa chäälpacni. ³ Nanab niguii guchaagni chäälni che rlajz chäälni, sigajcza gunaa nanab guchaagni chäälni che ni si'c rlajz chäälni. ⁴ Di gunaa guinibee lagajc tiejxhni, sa'csi chäälni rnibee tiejxhni. Sigajcza di niguii guinibee lagajc tiejxhni, sa'csi chäälni rnibee tiejxhni. ⁵ Na'c gusuni' tejtü lo chäälni. Maazru hueen coljia'n diidx na'c guchagsa'tu te xcheje' te cuedx-guiniabtu lo Dios.

Che luux cuedx-guiniabtu lo Dios, guchagsacsa'tu te na'c guquil bendxabtu chunäjtu ste'ca bejn.

⁶Rniä rediidxre lojtu te ni rlajz guchnaa sajc guchnaani, niluxh dina guiniä lojtu, nanabpac guchnaatu. ⁷Narä rlazä maläii sajc gac guiraa bejn si'c ni nacä. Dios abadeed loj tejga bejn xho mood guibajnni. Yu'reni sajc guibajñ tej mood, yu'zareni sajc guibajñ garenca mood.

⁸Loj rebejn xteb näjza loj regunabiuud rniä, hueen najc na'c guchnaareni, gacreni si'c narä. ⁹Niluxh palga di gacdi cue'cdxi lajzreni, suguchnaareni. Maazru huen guchnaareni te na'c guntisreni xhigab rlajzreni guchaa-greni te niguii o te gunaa.

¹⁰Loj rebejn ni abachnaa, rniä rediidx ni basa'n Dad Jesucrist loonu: "Na'c guro'n gunaa chäälni." ¹¹Niluxh palga guro'n te gunaa chäälni, na'c guchnasacni, o maazru hueen gusiäjlni diidx guibisacni lo chäälni. Sigajcza te niguii na'c guro'nni chäälni.

¹²Naj rediidx ni guiniä najc xhigab xtenä, xhet diidxdi ni basa'n Jesucrist loonu. Scree rulidxä la'tu. Palga yu' te niguii ni rililajz xtidx Dios, luxh chäälni di chalilajz xtidx Dios, luxh rlajz gunaaga cuäznäjni niguiiga, na'c guro'n niguiigani. ¹³Palga yu' te gunaa ni rililajz xtidx Dios, luxh di chäälni chalilajz xtidx Dios, niluxh rlajzni cuäznäjni gunaaga, na'c guro'n gunaaga chäälni. ¹⁴Palga yu' te niguii ni di chalilajz xtidx Dios, luxh chäälni rililajz xtiidxni, palga hueen nabannäj sa'reni, hueen najc yälruchnaaga nez loj Dios. Sigajcza palga yu' te gunaa ni di chalilajz xtidx Dios luxh chäälni rililajz xtiidxni, palga hueen nabannäjsa'reni, hueen najc yälruchnaaga nez loj Dios. Palga dini gac si'c, di Dios gunle' rexi'nreni, per naj abenle' Dios rexi'nreni. ¹⁵Palga chääl te gunaa o chääl te niguii ni di chalilajz xtidx Dios luxh rlajzni guilia' sa'ni con chäälni ni ahuililajz xtidx Dios, sujiizani.

Nani rililajz xtidx Dios diruni ga'p por cuäznäjni chäälni ni di chalilajz xtidx Dios, niluxh gurejdx Dios nuurnu te cuecdxini lajznu. ¹⁶ Sa'csi ¿xho najnlu, gunaa, la suslaa Dios chäällu lo dojl̄ xcuentlu, ä? O ¿xho najnlu, niguii, la suslaa Dios chäällu lo dojl̄ xcuentlu, ä?

¹⁷ Si'ctis ni baniidx Jesucrist lo tejganu, si'ctis ni gule Dios tejganu, si'c suguibaj̄nnu. Si'cza rulidxä gunrenini neñ guiraa reguidoo. ¹⁸ Palga tej niguii rililajz xtidx Dios, luxh yu'ni bee tiejxhni, xhet najcdini. Palga stee niguii chalilajz xtidx Dios, luxh xheti bee tiejxhni, xhet najcdizani. Sujia'nni si'cni najcni. ¹⁹ Xhet najcdi la yu'ni bee o xhet beedi yu'ni. Tejtis ni nanab gunni, gusoobni rediidx ni gunibee Dios. ²⁰ Tejgani jia'n si'cni najcni cheni gurejdx Diosni. ²¹ Palga najclu te mos ni guziireni te gunlu dzuun, dxejc huililajzlu xtidx Dios, na'c chulu yärsia' xcuent ni'c. Palga sajc gudzu'lu meel lo xlamlu, badzu'zani te gaclu te bej̄n ni rut rnibeedi. ²² Sa'csi nani najc te mos ni guziireni te gunni dzuun che huililajzni xtidx Dios, diruni gac te mos ni bio' nez loj Jesucrist, niluxh te bej̄n ni rut rnibeedi che rililajzni xtidx Dios, anajcni mos ni guzii Dios, najcni xmos Dios. ²³ Guzii Cristtu con xtiej̄nni, ni'c na'c gusaantu guinibee bej̄n la'tu te gac guntu xtzun Dios. ²⁴ Rebetzä, colchanuu gactu si'ctis ni najctu che gurejdx Dios la'tu, palga najctu mos ni guziireni, o te bej̄n ni rut rnibeedi.

²⁵ Redxa'p ni gajd guch̄naa, di Jesucrist ninibee xhini'c nanab gunreni. Gule Dios narä te gusule'ä xtiidxni. Naj gulidxäreni sa'csi nanä xtidx Dios, luxh racnäjzani narä. ²⁶ Runä xhigab hueen najc palga di reniguii guch̄naa sa'csi siääd yäl̄naganduxh lo guedxliujre. ²⁷ ¿La alabach̄naalu, ä? Na'c guro'nlu chäällu. ¿La alabaro'nlu chäällu, ä? Na'c chaxiilu chäällu. ²⁸ Palga guch̄naalu, xhet dojl̄di rujnlu. Palga guch̄naa te dxa'p, dizani gun dojl̄. Niluxh reni

ruch_{naa} sidejdreni trabajw lo yäl_{nabaj}_{re}. Ni'cni rniä na'c guch_{naa}tu sa'csi di rlazä tedtu trabajw.

²⁹ Rebetzä, rlazä guiniä lojtu rediidxre: Guxiiru dxej guibaj_{nnu} lo guedxliujre, ni'cni reni abach_{naa} na'c gunreni xhigab xtentis yäl_{ruch}_{naa}, te gac gunreni xtzuum Dios. ³⁰ Luxh reni cayoon, nanab gunreni si'cni xhet cayoondireni; reni rbalajzreni, nanab gunreni si'cni xhet cabaadi lajzreni; reni rzii xhicos, nanab gunreni si'cni xhet rajpdireni; ³¹ näjza reni rujn recos lo guedxliujre, nanab gunreni si'cni dini gunni, sa'csi recos ni rhuiinu lo guedxliujre, alacanitlojreni.

³² Narä rlazä na'c chutu yärsia'. Rebej_n ni gajd guch_{naa}, riureni rextzuun Dios, näjza xho guspaareni lajz Dios.

³³ Renani abach_{naa} riureni recos guedxliujre te guspaani lajz chääl_{ni}, ³⁴ tiop najc xhigabni xcuent recos nani gunni. Sigajcza najc te gunaa ni abach_{naa} con tejni gajd guch_{naa}. Sa'csi te gunaa ni gajd guch_{naa} riuni rextzuun Dios te gacreni gunadxan nez loj Dios con tiejxhreni näjza con lastooreni. Niluxh regunaa ni abach_{naa} riureni recos guedxliujre, näjza xho guspaani lajz chäälreni.

³⁵ Rniä rediidxre par xcäl_{nasa}'ctu, xhet gudxonädi la'tu, te gunrutu redzuns'a'c, te chanälazsa'ctu Dios.

³⁶ Palga yu' chu te niguui lojtu ni rujn xhigab, maazru hueen guch_{naa} xindx'a'pni sa'csi acayajcni gunagool, dini gun dojl, sajc gudeednini guch_{naa}ni. ³⁷ Palga steeni dini gun xhigab si'c nanab gunni, sajc gunni si'ttis ni rlanj_{ni} palga abejnpacni xhigab ne_n lastooni di xindx'a'pni guch_{naa}, hueenza najc si'c. ³⁸ Ni'cni nani rudeed xinda'pni guch_{naa}, hueen ruj_{nni}, sigajcza nani dini gudeed xindx'a'pni guch_{naa}, laacaza ruj_{nni}.

³⁹ Te gunaa ni abach_{naa}, rajpni por guiban_{nä}j_{ni} chääl_{ni} guideb nabaj_n chääl_{ni}. Palga guet chääl_{ni}, jianxtebni stehuält, dxejc sajc guch_{naa}ni chutis niguui ni rlanj_{ni},

palga najcni tej ni ahuililajz xtidx Dios. ⁴⁰ Narä rchaloä maazru guibaa lajzni palga dini guchñaä. Si'c najc xhigab ni runä, luxh riliipac lazä cayacnäj Sprit Dxi xten Dios narä.

8

Yälrajw ni ruzujreni lo rebanäjb

¹ Rniä lojtu xcuent reyälrajw ni ruzujreni lo rebanäjb. Guliini guiraanu rajpnu yälñajn xcuent recosga. Niluxh yälñajn rujn rajc bejn gualajz. Luxh yälñälajz sa'ni, ni'c rujn racñajnu resa'nu. ² Palga yu' chuni'c rujn xhigab nanduxhni, rusgueeni lastooni sa'csi cayäädxru gacbeeni si'c ni nanab gacbeeni. ³ Palga yu' chu sanälajz Dios, Dios anumbee bejnga.

⁴ Ni'cni, xcuent reyälrajw ni risujreni lo rebanäjb, anancheenu xhet sajcdi rebanäjb ni yu' lo guedxliuj, ruti stee Dios; tejtis ni najc Gueb Dios. ⁵ Masque yu' reni rniireni najc “dios” xhaguibaa o loj guedxliuj, luxh yu'za xhidajl “dios” näjza xhidajl lam ni rnibee, ⁶ per nuurnu nadonnu yu' tejtis Gueb Dios, Dad nani benchee guiraa recos, luxh lojtisni nabajñnu. Rajpnu tejtis Dad ni rnibee loonu, ni'c najc Jesucrist. Xcuent xcälñibeeni guc-chee guiraa recos loj guedxliuj, luxh nuurnu nabajñnu xcuent Jesucrist.

⁷ Niluxh xhet guira'ti bejn najn yu' tejtis Dios. Yu' rebejn ni ahuililajz xtidx Dios abia'reni rajñreni rebanäjb, luxh rajwzarenı reyälrajw lascanu guzujni loj banäjb sa'csi nacäyru xcäriejnreni, ni'cni et laadi ria'n lastooreni, rxhiñza xcäriejnreni. ⁸ Xhet xcuent xhi rdaudinu sajç guibañsa'crunu lo xnejz Dios. Xhet najcdi palga guidaunu o palga dinu guidau. ⁹ Coñnatiro xhi rujntu te na'c guntu jiajb te bejn lo dojl nani gajd chalilazsa'c xtidx Dios. ¹⁰ Palga te bejn ni gajd chalilazsa'c xtidx Dios fiini

cayajwlu reyälrajw ni guzuj lo rebanäjb, luxh luj najclu te bennajn, sa'csi dee gajd gacbesa'c rextidx Dios, ¿la di lajzni gac nadip te näjza laani chatajwni yälrajw ni guzuj lo rebanäjb? ¹¹ Niluxh luj, xhet dojldi cayujnlu, per bejtzlu ni gajd chalilazsa'c xtidx Dios, sixijnni, luxh najcni bejtzlu sa'csi näjza par laani gujt Dad Jesucrist lo cruzj. ¹² Si'cza che rujnlu dojł lo bejtzlu, runnajlu lajzreni sa'csi gajd xcäriejnreni jiansa'c, luxh si'c cayujnzalu dojł lagajc lo Crist. ¹³ Ni'cni, palga narä runä riabsac betzä lo dojł xcuent ni rauä, hueenru dirunä gauä yälrajw ni gun jiajb betzä lo dojł stehuält.

9

Xhi sajc gun te apost

¹ ¿La dina gacä te bejn ni rut lojdi yu'ä? ¿La xhet apostdi narä? Ni abahuiä lo Dad Jesucrist, abasule'ä rextiidxni lojtu, ni'c huililajztu xtiidxni. La'tu najctu xtzunä ni runä lo Dios. ² Yu' reni di gumbeeni narä si'c te apost, niluxh la'tu abiembesa'ctu narä sa'csi ahuililajztu rextidx Jesucrist ni abasule'ä lojtu. Ni'c ruluiloj guliipac nacä te apost.

³ Diidx ni rniä scree loj reni di chalilajz nacä apost najc scree: ⁴ ¿La di riäjł xca'ä guiraa ni runiidxtu gauä näjza ni runiidxtu yä'ä? ⁵ ¿La digacdiza gapä te chälä ni ahuililajz xtidx Dios dxejc chanääzani sigajc rujn guiraa reapost, näjza rebetzhuin xten Dad Jesucrist näjza Pedr? ⁶ O ¿la xtebtis Bernabé näjza narä di gacdi cuääz jiennu dzuun te guidaunu lał rusule'nu xtidx Dios? ⁷ ¿Chuni'c rajc soldaad luxh lagajc laani siini xhi gauni? O ¿chuni'c rusuj yaguub luxh dini gau ninejxh ni rcaj lojga, ä? O ¿chuni'c rajp gaii dxib, luxh dini yä le'ch ni rudeedreni, ä? ⁸ Na'c guntu xhigab lagajc xcuentä caniä rediidxre lojtu, sa'csi näj loj xleii toMoisés caj diidx xcuent recosre. ⁹ Loj reguijtz

xten xleii toMoisés caj rediidxre: “Na'c gusällu guijxh ro' gon che cayo'tni yejc triuu.” ¿La guniitis Dios rediidxre sa'csi riuni regon, ä? ¹⁰ ¿Dini gac! Xcäl'nasa'cnu guniini rediidxga, sa'csi bejn ni rujn dzuun lo niaa näjza nani rusia triuu riäjł gunlojni xca'ni te yäl'nasa'c ni rajc lo xniaani. ¹¹ La'tu najctu si'c te yuj cadro gule'cnu binij sa'csi basure'nu rextidx Dios lojtu, ¿la rujntu xhigab dzunro najc gacnäjtu nuurnu tudxene', ä? ¹² Palga racnäjtu ste'ca bejn ni ruluiitu, nungäjłru gacnäjtu nuurnu.

Niluxh gajdnu guinii si'c lojtu sa'csi di rlanjzinu guidxoону chailazsa'ctu rextidx Dios, ni'c chotipnu lajznu guiraa retrabajw ni cadeednu. ¹³ La'tu najntu reni rujn dzuun neñ guidoro rajwreni rebääl ni risa'nreni lo Dios, sigajcza reni rujn dzuun lo dxan cadro risa'nreni xpääl reguidxaa lo Dios, näjza laareni rajwreni rebäälga. ¹⁴ Si'cza gunibee Dad Jesucrist loj reni gusule' xtidx Dios, xca'reni xhi gaureni lagajc loj reni rililajz xtiidxni. ¹⁵ Niluxh gajdpacna gunä si'c, xhetza caca'ädi. Dizana gucuaä rediidxre lojtu naj te guniidxtu xhi xca'a. Hueenru guetä te na'c gudzucaj te bejn yälrbalajz ni rapä xcuent dzuun ni runä lo Dios.

¹⁶ Narä dina gapä xhicuent guiliä'pä xpala'nä che rusule'ä xtidx Dios. Sa'csi si'c nanabpac gunä, sa'csi probe'za narä palga dina gusule'ä xtidx Dios. ¹⁷ Palga gunä dzuunre sa'csi rdxaglazäpac gunäni yu' xhi guniidx Dios loä. Mase runäni con yälrigaan, empac Dios agule narä te gusule'ä xtiidxni. ¹⁸ ¿Xhini'c najc xcuent ni xca'ä, ä? Che gusule'ä xtidx Dios lo chutis bejn, ligaj gusule'äni, te di gusule'ä xtiidxni te guniidx rebejn xhi guniidxreni xcuent xtzunä, mase si'c riäjł gunreni.

¹⁹ Rut xmosdi nacä, luxh lagajc narä benä xhigab gacä si'c te mos te gunä gaan chailajz xhidajł bejn xtidx Dios.

²⁰ Cheni yu'ä loj rexpejn Israel, runä si'cni rujnreni te

gunä gaan chalilajzreni rextidx Dios. Che rlazäza guiniä loj reni nabajñ loj xleii toMoisés, dxejc runä si'c rujnreni te gunä gaan chalilajzreni rextidx Dios, niluxh diruna guibanä lo leiiga. ²¹ Stee lajt cadre rlazä gunä gaan reni di guibajñ lo xleii toMoisés, runä si'c rujnzareni, mase empac nabanä lo xleii Dios sa'csi rusobä diidxni basa'n Crist. ²² Cheni yu'ä loj reni guxii rililajz xtidx Dios, racäza si'c ni najcreni te gunä gaan chalilazsa'creni. Narä runä sigajc rujnreni, te si'c gunä gaan chalilajz xhidajlreni xtidx Dios. ²³ Runä guira'ti xcuent xtidx Dios ni rusläa bejñ lo dojl, te xca'zanu, narä näjza rebejñ ni ahuililajz xtidxä, yälñabajñ par tejpas.

²⁴ Anajntu che ru' te lanij, che ruxuñ reniguii, guiraareni ruxuñ, niluxh tejtis ni rca' ni ruzalajzreni. Colguxuñza nez lo Dios te gunzatu gaan. ²⁵ Guiraa reni rlaz guxuñ rapdareni tiejxhrene te ga'p tiejxhrene yälñadip, yälñadaan. Luxh laareni ruxuñreni si'c te gunreni gaan te cos ni di gaclaa agunitlojni. Niluxh nuurnu ruxuñnu te guniidx Dios loonu nani dipac nitloj. ²⁶ Narä dina guxuñä si'cni dina ganä caro cha'ä, dizana gucuää si'c te bejñ ni rucuanäj te balaa, o cayääztisni lo bej. ²⁷ Niluxh narä runä rajc tiexhä si'c xmosä te na'c gunni si'ctis ni rlazjni, te gunni nani rlazj Dios te di cheni abasule'ä xtidx Dios loj xhidajl bejñ, gusanxtujy tiexhä narä.

10

Yälrulijdx lo xcuent rebanäjb

¹ Rebetzä, di rlazä jiällajztu ni gusajc retoxtadgoldoonu. Gusajreni xpalaa te za gudejdzareni galäii nisdoo ni laa Nisdo Xniaa. ² Gudejdreni xpalaa te za näjza gudejdreni galäii nisdoo; ni'c najc si'c te yälrobnis sa'csi sanajlreni toMoisés. ³ Sigajcza guiraareni gudajw tejtis yälrajw ni baxhal Dios xhaguibaali. ⁴ Guiraazareni gu' nis ni badeed

Dios, Dios bejn birii nisga cuä' te guilaj. Luxh Xpriet Crist gusanäjreni cadrotis sääreni nez lo reyubidzroga. Luxh con xcäl̄rnibeeni birii nis loj guilajga, Crist najc si'c guilaj ni huinäreni. ⁵ Dios bidxehnäj xhidajlreni, ni'c xhidajlreni gujt nez lo reyubijdzga.

⁶ Guiraa rediidxga najc te yäl̄rulijdx loonu, te na'c guichagljaznu jiennu lagajc redojl̄ ni bejn retoxtadgoldoonu. ⁷ Na'cza gan̄tu rebanäjb si'c ni bejn baltireni; acaj lo rexquijtz Dios xcuentreni: “Rebejn̄ ni guyaa lajz gurejreni te gu'reni, gudajwreni, dxejctiru huisuren̄i te gusloj caguijtreni.” ⁸ Na'c chunäjnu stee bejn̄ di gac chääl̄tu si'c bejnreni, ni'cni gujt gal̄bichon̄ mil̄reni tejtis dxej. ⁹ Na'cza guche'chnu Dios con rextojl̄nu si'c bejn balti rebejn̄ga, ni'cni gujtreni sa'csi gudauya' bäl̄reni. ¹⁰ Na'cza chamojmtu xcuent ni rujn Dios si'c ni bejn rebejn̄ga xcuent ni bejn Dios, ni'cni baxhal̄ Dios angl̄ xten yäl̄gujt bagu't xhidajlreni.

¹¹ Guiraa redee gusajc retoxtadgoldoonu te rulijdxni nuurnu, cuajzaren̄i lo guijtz te guluii rediidxga nuurnu xho riäj̄l̄ jiennu, nuurnu ni nabaj̄nnu nen̄ redxej naj. ¹² Ni'cni chutis ni rujn xhigab nabansa'cni nez loj Dios, sudzu'tzni te di jiabsacni. ¹³ Xheti te trabajw ni cadejdtu nani gajd ted chutis bejn̄. Niluxh di Dios cuäl̄aztu, dini gusaan tedrutu dzunduxh nani digacdi guntu huant, suniidx Dios yäl̄nadip yäl̄nadaan lojtu te che tedtu trabajw sidxäl̄tu xho guibicajtu lo dzunduxhga, te gutiplajztu.

¹⁴ Ni'cni rniä lojtu, rebetzä nani sanäl̄azä, col̄bicaj lo yäl̄raj̄n̄ xten rebanäjb. ¹⁵ Rniä lojtu si'c lo te bejn̄ nasin̄, te bennaj̄n̄: col̄gulatzsa'c rextidxä don la laaca najceni. ¹⁶ Che rdaunu xchej xten Dad Jesucrist najcni te seen nabannänu Jesucrist. Che rdunnu nen̄ co'p, rnaalajznu gudijx Dad Jesucrist xtiejn̄ni xcuent xtoj̄l̄nu lo cruzj. Che rdaunu yätxtiil, sälojni anajcnu tejtis xcuent tiejxhni ni

badeedni cuaj lo cruzj xcuentnu. ¹⁷ Sa'csi yu' tejtis yätx-tiil, mase najcnu xhidajl, najcnu si'c tejsi tiejxh sa'csi tejsi yätxtiil rdaunu che rauxchejnu xchej xten Dad Jesucrist.

¹⁸ ¡Bahuii xho rujn rexpejn Israel! Rajwreni xpääl reguidxaa ni rile'creni lo Dios lo dxan nen guidoo, ni'c najcreni tejsi con guiraa rebejn nani rujn sigajc rujnreni.

¹⁹ ¿Xhixhni'c rlazä guiniä, naj? ¿La caniä yu' xhi sajc gojn nani gule'c bejn lo banäjb, ä? O ¿la yu' xhi sajc banäjbga, ä? ²⁰ Xhet sajcdireni. Narä caniä lojtu dee: Recos nani rbe'c rebenzijt lo rebanäjb, lo rebenđxab cabe'crenini, et lojdi Dios. Luxh narä dina rlazä gactu tejsi con rebejn nani rbe'c lo rebenđxab, te di chachunäjzatu rebenđxab.

²¹ Sa'csi digacdi yätu co'p ni rusnaj laaznu ni bejn Dad Jesucrist lo cruzj nägajcza co'p nani rudeedreni lo rebenđxab. Digacdiza guidaunu xchej xten Dad Jesucrist nägajcza xchej ni rudeedreni lo rebenđxab. ²² O ¿la rlanjnu guche'chnu Dad Jesucrist, ä? ¿Xhixh maazru nadipnu lojni, ä? ¡Gurniä lojtu!

Colyejn guira'ti te chä'p xpala'n Dios

²³ Guliicani, sajc jiennu xhitis ni rlanjnu jiennu, niluxh xhet guira'ti ni rlanjnu jiennu najc hueen par nuurnu. Guira'ti najc laaca, niluxh yu' reni di gacnäj gustioobnu lo xcälrlililajz Dios. ²⁴ Na'c guntu xhigab quiiltistu lagajc xcäl'nasa'ctu; maazru hueen quiilzatu xcäl'nasa'c xpisintu. ²⁵ Coltajw xhitis bääl ni rdo' lo guii, na'c guiniabdiidxtu caro siäädni te di gacnaj xcäriejntu. ²⁶ Lo xtidx Dios caj rediidxre: “Sa'csi guideb guedxliuj näjza guiraa ni tre' lo guedxliuj najc xten Dios.”

²⁷ Palga jiädgajñ te bejn ni di chalilajz xtidx Dios luj jiädtaunäjlni luxh acuäjblu chäälu, huijza, gudajw xhitis ni cue'cni nez lojlu, na'c guiniabdiidxlu te di gacnaj xcäriejnlu. ²⁸ Palga yu' chu naa lojlu: “Dee najc bääl

ni bile'cnu lo rebanäjb”, na'c gauluni, didi gunni gunijt dade'ga ni gunii si'c lojlu te di gacnajza xcäriejn chutis. ²⁹ Dina guiniä xcäriejnlu, didi gunnajni xcäriejn stee dade'ga; mbaj naj, ¿xhicuent riäjł gula'tzreni narä sa'csi rajc runä guira'ti porsi racnaj xcäriejn ste'ca bejn, ä? ³⁰ Palga rudedä xquixtios lo Dios nani runiidx xhi rauä, ¿xhicuent rniyajreni narä ni rauä, luxh abadedä xquixtios lo Dios? ³¹ Ni'cni palga gautu, o palga yätu o xhitis ni rujntu, colyujn guira'ti te chä'p xpala'n Dios. ³² Na'c guche'chtu nicla rexpejn Israel niclaza rebenzijt, niclaza rexpejn xquidoo Dios. ³³ Sigajcza runä narä, runä guira'ti ni ruspaaj lajz rebejn, dina quilä xcäl_nasa'cätis, alga rguilä xcäl_nasa'c xhidalduxh bejn, te laareni lo dojl sa'csi ahuililajzreni xtidx Dios.

11

¹ Colyejn si'cni runä narä, sigajcza narä runä si'cni rujn Jesucrist.

Xho riäjł gun regunaa nen xquidoo Dios

² Rliä'pä xpala'ntu sa'csi lo guira'ti rnaj lajztu narä, rna-jza lajztu rediidx nani baluiä lojtu, sudzu'tztu rusoobtu rediidx sigajcni baluiäreni lojtu. ³ Narä rlazä gacbeepactu Jesucrist najc nani rnibee lo niguii, dxejctiru niguii rnibee gunaa si'c rnibee Dios Jesucrist. ⁴ Chutis te niguii ni yu' xhumbreel yejcnii lałni cabedx-canabni lo Dios o lałni cag-uluiini xtidx Dios, laani rusanxtujyni yejcnii. ⁵ Palga yu' te gunaa ni dini gusäu xpäiini yejcnii che cabedx-canabni loj Dios o che caniiini xtidx Dios, rusanxtujyni yejcnii sa'csi najcni sigajc najc te gunaa ni abigaj yejcnii. ⁶ Palga di te gunaa gusäu xpäiini yejcnii suguigaj yejcnii. Palga najcni te xtujy guigaj yejcnii, sugusäuni xpäiini yejcnii. ⁷ Di guchaag gusäu te niguii yejcnii sa'csi najcni si'c xtuxh Dios, näjza xcälrdimbicha' Dios. Niluxh regunaa najc

si'c xcälrdimbicha' niguii. ⁸ Sa'csi di niguii nirixtiej cuä' gunaa; gunaa najc ni birixtiej cuä' niguii. ⁹ Xhetza xcuent gunaadi guc-chee niguii; gunaa najc ni guc-chee xcuent niguii. ¹⁰ Ni'cni nanab jiäu yejc gunaa neñ guidoo si'c te seen lo rexangl Dios yu' chu rnibeereni. ¹¹ Niluxh nez lo Dios nicla niguii niclaza gunaa digacdi guiban xtebreni. ¹² Sigajc galoo birixtiej gunaa cuä' niguii, sigajcza naj gunaa najc nani ruu báz; luxh Diostis najc nani runchee guira'ti rebejn.

¹³ Colyejn lagajc xhigabtu naj, ¿la laaca najcni cuedx-guiniab te gunaa lo Dios lañ ni xhet niäudi yejcn, ä? ¹⁴ Loj reben guedxliuj guiraa reniguii rgaj yejcreni, sa'csi najcni te xtjuy guigaduxh xquidxejcreni. ¹⁵ Niluxh re-gunaa hueen najc rga' xquidxejcreni te rusäuni yejcn. ¹⁶ Palga yu' chu tilidiix xcuent rediidx nani caniä lojtu, nanab gacbeeni si'ctis riennu, si'ctisza rujnreni neñ guiraa rexquidoo Dios.

Xho ruxhinreni xchej Dad Jesucrist

¹⁷ Rediidxre ni cagucuaä lojtu, direni guiliä'p xpala'ntu, sa'csi che rdxagsa'tu neñ xquidoo Dios, lacuaa laaca cuetu, xhet laadi rujntu. ¹⁸ Rnixgää dee: Abiejn diagä che re'tu lo xquidoo Dios, rlia'tu lo sa'tu rajctu tiop cuaa; luxh riliica lazá rediidxre. ¹⁹ Pet naatu nanab guntu si'c te gacbeetu churen'i'c sanälajzpac Dios, churen'i'c saj cru lo xtzuum Dios. ²⁰ Ni'cni che rdxagsa'tu, dini gac te cuetu lo xmex xchej Dad Jesucrist, ²¹ sa'csi che agule'creni xchej lo mex, tejga bejn rlajz xcaxgaa xhi gauni, dxejc yu' reni agudxadoo xque'reni, agusozzaren, lañi yu' stee cuaa bejn calaan, gajdreni gau. ²² ¿Xho mood? ¿La xheti roliztu cadre gac gautu, yätu, ä? O ¿la rbälazlu xquidoo Dios, ni'c rusanxtujylu rebejn ni xhet räjpdi, ä? ¿Xhini'c

guiniä lojtu naj? ¿La naatu guiliä'pä xpala'ntu xcuent nani rujntu, ä? ¿Gurniälojtu guiliä'pä xpala'ntu!

Xchej Dad Jesucrist

(Mt. 26:26-29; Mr. 14:22-25; Lc. 22:14-20)

²³ Baluiloj Dad Jesucrist loä lagajc nani baluiä lojtu xcuent xho bejnni guxhijñ che gudaunäjni rexpejnñi te xchej xten pascw, guxhijñ ni gudo'ni. Cua'ni yätxtiil, ²⁴ dxejc che abadeedni xquixtios lo Dios, gula'ni yätxtiilga, räjpni lojreni: “Colgajw, dee najc tiexhä ni gudedä guet xcuenttu. Scree guntu te guinalajztu narä.” ²⁵ Si'cza bennäjni co'p che guluix gudajwreni, räjpni lojreni: “Ni yu' neñ co'pre najc si'c xtienä; che ju'treni narä, sixe' xtienä xcuenttu, si'c te seen xten didxcoob ni gusa'n Dios loj rebejnñ ni aguleni. Scree guntu te guinalajztu narä.” ²⁶ Che gautu yätxtiilga, che yätu neñ co'pga, ruluilosactu xhi bejn Jesucrist che gudijxnñ xcuent rextojlñu lo cruzj; si'cza colyujñ dxejli ni guibisacni lo guedxliujre.

Xho riäjł gac xchej Dad Jesucrist

²⁷ Ni'cni rniä lojtu, chutis tejtñ ni rajw yätxtiil, ni rä'za co'p xten xchej Dad Jesucrist, palga dini gusoob xtidx Dios, rujñni dojl, najcni si'cni lagajc laani bagu't Jesucrist, baxhe'zani xtiejnñi. ²⁸ Niluxh sugula'tz tejgatu lagajc lastooni don la yu' xhi dojl bejnñi, dxejcti sajç gauni yätxtiil, yäni co'p xten xchej Dad Jesucrist, sa'csi abaxhobdojlñi. ²⁹ Chutis bejnñ ni gau, ni yä xchej Dad Jesucrist, luxh dini gula'tz lagajc lastooni xhicient gauni, yäni xchej Dad Jesucrist, lagajc laani rujñni jiajb xcälñaj Dios yejçni. ³⁰ Ni'cni lacti resa'tu racxhuu, xhet nadaanreni, luxh yu'zarenì agujt. ³¹ Ni'cni nanab fiinu xho najcnu, guiniabnu lo Dios gudzucajnñ rextojlñu te didi tednu trabajw. ³² Niluxh che rdejdnñ trabajw, rdejdnñi

te na'c tednu trabajwduxh si'c ted reben_u guedxliuj che gacreni yälguxhtis xten Dios.

³³ Ni'cni rniä lojtu, rebetzä, che guire'tu te gautu xchej, colcuäjz resa'tu. ³⁴ Palga yu' chu tejtü ni calaan, sugauni lagajc rolijzni, te di gun Dios yälguxhtis lojtu. Guiraa rexhistee cos, che jiälä ro'c fiä don xho gacsä'cni.

12

Dzuun ni rudeed Sprit Dxan xten Dios lo tejga ni rililajz

¹ Rebetzä, rlazä gabeetu xcuent dzuun ni rudeed Sprit Dxan xten Dios lo tejganu.

² La'tu najntu che gajdtu chalilajz xtidx Dios, rajntu chutis banäjb ni di gacbee, ni naatis bejn_u gan_u. ³ Ni'cni rlazä gabeetu naj, nicla tejtü ni yu' Xsprit Dxan Dios nen_u lastooni sajc guinii: “Xhet sajcdi Jesucrist.” Luxh rut rajcdi rni: “Jesucrist najc Dadbid baxhuaannu”, palga di Xprit Dxan Dios cuääz nen_u lastooni.

⁴ Mbaj naj. Yu' xhidajl dzuun ni rudeed Dios loj rebejn_u ni huililajz xtiidxni, niluxh tejsi najc Xsprit Dxan Dios ni rujn dzuunga nen_u lastoo guiragajcnu. ⁵ Yu'za balti cuaa dzuun nani riennu, niluxh tejsi najc Xtadbid baxhuaannu. ⁶ Yu' xhidajl mood rajc dzuun, niluxh tejsi Dios rujn dzuunga lastoo guiralii bejn_u. ⁷ Tejga bejn_u ruluiloj garen-garen xtzuun Sprit Dxan xten Dios, niluxh guira'ti redzuunga najc te gacnäjreri guiraanu. ⁸ Lo tej bejn_u rudeed Sprit Dxan yäl_unasin_u, lo steeni rudeed lagajc Sprit Dxanga yäl_unajn. ⁹ Lagajcza Sprit Dxanga rudeedzani yäl_urililajzro lo tejni, dxajc lo steeni rudeedza lagajc Sprit Dxanga yäl_urnibee te rusiajcni yäl_uracxhuu. ¹⁰ Loj stee bejn_u rudeedzani yäl_urnibee te gunni milaagwr, loj stee bejn_u rudeedni yäl_uriembeee te sajc guinixgaani xcuent recos ni churu gac; lo steeni rudeedni yäl_unasin_u te gumbeeni chu najc Sprit guliipac, näjza chu najc sprit ni rusguee.

Lo stee bejn rudeedzani guiniini garen-garen redidxsaj; loj stee bejn rudeedzani yälracbee te rajc rniini loonu xhini'c gunii bejn ni rnii garen-garen redidxsaj. ¹¹ Niluxh tejsi najc Sprit nani rujn guiraa redzuunre, racnäjni rujn tejganu xtzuunni si'ctis ni rlajzni.

Guiraanu najcnu te la' tejsi tiejxh

¹² Sigajc ni najc tiejxhnu tejsi, mase yu' xhidajl la' xtenni, tejgareni te la' tejsi tiejxh, sigajcza najc rebejn nani huililajz xtidx Jesucrist. ¹³ Guiraanu, mase najcnu rexpelj Israel o bejn griegw, mase najcnu mos o mastr, gurobnisnu con laj Sprit Dxan che huililajznu xtidx Dios, te gujcnu si'c tejsi tiejxh, luxh tejsi Sprit Dxan xten Dios biädläjz nejn lastoonu.

¹⁴ Sa'csi tiejxhnu dini gac tejsi la', najcni balti la'. ¹⁵ Paru naa ni'nu: “Sa'csi dina gacä te naa, ni'cni dina gacä te la' tiejxhre.” ¿Xhixh porsu ni'c dini gac tla' tiejxhga, ä? ¿Gurniälojlu! ¹⁶ Palga diajgnu naa: “Dina gacä te baloj, ni'cni dina gacä te la' tiejxhre.” ¿Xhixh porsu ni'c dini gac tla' tiejxhga, ä? ¿Gurniälojlu! ¹⁷ Palga guideb tiejxhni niajc te baloj, ¿xhi cojn niejn diajgni? Palga guideb tiejxhni niajc te diajgni, ¿xhi cojn chuxhi'ni? ¹⁸ Mbaj naj, ni'c basoob Dios guiraa rela' te guc-chee tiejxhnu si'ctis ni rlajzni gacni. ¹⁹ Paru niajc guidebni si'c tejtis la'ni, ¿xho niajcpacni te tiejxhni dxejc? ²⁰ Niluxh naj ensilaani yu' xhidajl la' te najcni tejsi tiejxhni.

²¹ Te balojnu di gac gäbni lo naanu: “Dina guiquinälu”, niclaza bitiuycjni di gac gäbni lo ni'ni: “Dina guiquinälu.” ²² Chucala lapacreni rquiinru nani ruzejn lascanu xhet sajcdireni. ²³ Luxh retla'ga nani rchalonu guxii sajcreni, reni'c maazru saj. Luxh reni rtuinäänu, niguii sigajc gunaa, reni'c riapdarunu. ²⁴ Biätla sgaii la' tiejxhnu nani rlui saruru, reni'c di guiquiin gapdanuni. Niluxh

abenchee Dios tiejxhnu si'c, te gapdaru bejn retla' nani lascanu guxiiru sajc. ²⁵ Bejn ni si'c te di chu yälrdijl lo retla' tiejxhnu, te guiraa retla'ga gacnäj sa'reni. ²⁶ Ni'cni che et laadi yu' te la' tiejxhnu guidebni ru' et laadi. Sigajcza che guiliä'pnu xpala'n te la' tiejxhnu, guideb tiejxhnu rbalajz.

²⁷ Ni'cni guiraanu najcnu si'c tiejxh Jesucrist. Tejganu najc te la' tiejxhni. ²⁸ Luxh abadeed Dios yälrnibee lo tejganu lo xquidoo ni te gunnu xtzuun-xtzuunni. Ganidtoo guleni reapost; ni rojpga guleni rebejn ni rnii xtidx Dios; ni riojnga, guleni rebejn ni ruseed; dxejcti guleni reni rujn remilagwr, reni rusiajc benracxhuu, reni racnäj, reni rnii garen-garen redidxsaj. ²⁹ Et guiraadi rexpejn Jesucrist najc apost. Et guiraadizareni rniireni xtidx Dios. Et guiraadireni rajc ruseed. Et guiraadizareni rajc rujn remilagwr. ³⁰ Et guiraadireni rajc rusiajc rebenracxhuu. Etza guiraadireni rajc rnii garen-garen didxsaj, et guiraadireni rajc rnii xhi säloj redidxsajga. ³¹ Nanab guideb lastootu rlanjtu guniidx Dios reyälrnibee ni najc maazru hueen lojtu. Niluxh narä guluiä lojtu te nezyuj ni najc hueenru loj guiraareni.

13

Yälsanälajz

¹ Palga guiniä guiraloj xtidxsaj rebejn, o xtidx rexangl Dios, luxh dina chanälazä rebejn, rubejtis xtidxä si'c te tamboor o te platii. ² Palga sajc guiniä xtidx Dios xcuent recos ni churu gac, luxh racbesa'cä guiraa recos xhiga'tz xten Dios, näjza guiralii yälnasiñ xten guedxliujre, palga rapä yälrlilazduxh te gac gäpä lo redajnre, “colguibicaj”, luxh rbicajreni, niluxh xhet sanälazädi rebejn, rut nacädi. ³ Palga gudedä guiraa rehxixtenä nani rapä te gau rebejn ni xhet rajpdi; palga gudedä tiexhä te checni, luxh xhet sanälazädi rebejn, xlia'si gunä guiraa redzuunga.

⁴ Rebejn ni rajp yälsanälajz cabäjzreni, najczareni bensa'c, direni säblajz xhi xten sa'reni, direni guschä'p lagajc xpala'nreni, direni gac gualajz. ⁵ Direni gun recos ni di guchaag, dini quiil xcäl'nasa'ctisni, dini guidxe'ch, dini jiu redojl ni rujn bejn lojni. ⁶ Nani rajp yälsanälajz dini guibalajz che rujn stee bejn dojl, alga rbaa lajzni che laaca rujn bejn. ⁷ Nani rajp yälsanälajz rujn huant xhitis cos, rililajzni hueen xcuent xhitis cos, sanuutis cabäjzni, rajc rdejdn xhitis trabajw.

⁸ Yälsanälajz dipacni nitloj. ¿La rniireni xtidx Dios xcuent recos ni churu gac, ä? Sidzujn dxej sibäjz redidixga. ¿La rajc rnii bejn garen-garen redidixsaj, ä? Sidzujn dxej siacdx redidixsajga. ¿La yu' yäl'najn? Sidzujn dxej sinitlojpacni. ⁹ Sa'csi naj guxilii racbeenu, guxilii xtidx Dios xcuent recos ni churu gac rajc rniinu, ¹⁰ niluxh che jiädsac Jesucrist ni rajp guiralii yäl'najn, sinitloj xcäl'nandxucnu.

¹¹ Che gucä biuux, guniä si'c biuux, benäza xhigab si'c biuux, niluxh che bidzunä lo yäl'bengol, gunitloj rexhigab biuux ni benä galoo. ¹² Sa'csi naj rhuiinu si'c loj te guihuajn ni nacäjy, luxh che guibanänänu Dios xhaguibaa, suhuisa'cnu si'cni ruhuii bejn che suga'ni loj sa'ni cahuiinini. Naj racbeenu re'cti rec, niluxh dxejc sacbesa'cnu si'cpacni numbee Dios nuure. ¹³ Niluxh naj ria'n yäl'rilitajz näjza yäl'rbäzljajz, näjza yälsanälajz. Lo guidxon redee, sajcro yäl'rinälajz.

14

Renani rnii rediidx

¹ Ganiddoo colquiil yäl'rinälajz, colnabza lo Dios te guniidxrni xhi stee dzuun, niluxh colyejnru te xca'tu yäl'rnibesa'c te gusule'tu xtidx Dios. ² Che rnii te bejn garenca diidx ni di rebejn gacbee, rniini lo Diostis, et lojdi

rebejn, sa'csi rut racbeedi xtiidxni, mase caniini cosro, cosxhiga'tz nani rului Sprit Dxan xten Dios guiniini. ³ Niluxh bejn ni rusule' xtidx Dios, rustioobni xcälirililajz bejn ni ruliidxni, ruspaani lajz nani rac-huin lajzni. ⁴ Che rnii te bejn garenca didxsaj ni rut racbeedi, lastootisni rustioobni, niluxh bejn nani rusule' xtidx Dios xcuent recos ni churu gac, laani rustiobruni lastoo guiraa re-benguidoo.

⁵ Narä rlazä maläii rajc rnii guiraatu garen-garen diidx, niluxh hueenru gac gusule'tu xtidx Dios. Maazru sajz nani rajc rusule' xtidx Dios loj nani rnii garenca diidx palga di gacdi gusule'ni lo rebejn xhini'c caniini. ⁶ Mbaj naj betzä, che jiälä lojtu, palga guiniä garenca diidx lojtu, ¿xhi gacnäjni la'tu? Hueenru guiniliä xcuent te cos ni abaluiloj Dios loä, o xcuent te yälñajn, o xcuent te xtidx Dios, o xcuent te yäl'rului.

⁷ Ni ruhuiinu xho najcza reinstrument ni rol bejn si'c te bizej, o te harp; palga di bejn gol'sa'creni, ¿xho jiennu gacbeenu xhi dij cayol'reni, ä? ⁸ Sigajcza lo guerr, palga direni gol' cornet dippac, ¿xho gacbeereni agojl chatijl'reni, ä? ⁹ Sigajcza la'tu, palga ditu guinisa'c didxsaj nani racbee bejn, ¿xho gunreni gacbeereni xhini'c caniilu, ä? Xlia'si guiniilu, lo bejtis sää xtiidxlu. ¹⁰ Yu' xhidalduxh didxsaj lo guedxliuj, luxh xheti tejni nani xheti xnejzni. ¹¹ Niluxh palga dina gacbeä didxsaj ni rniireni loä, nacä si'c te benzijt loj nani canii loä, sigajcza sajz nani caninäj narä. ¹² Ni'cni la'tu ni rlaiztu xca'tu yäl'rnibee xten Sprit Dxan te guntu xhi redzuun, col'guejs, col'nab lojni xhidajl dzuun te gacnäjtu tioobru xcälirililajz rexpenn guidoo.

¹³ Ni'cni palga yu' te bejn ni rnii garenca didxsaj, suguniabni loj Dios yäl'rnibee te gac gusule'ni diidx ni rniini lo rebejn. ¹⁴ Palga cuedx-guniabä lo Dios con te didxsaj ni dina gacbeä, lastoätis ni calä'p xpala'n Dios,

niluxh xcärienä xhet cayacbeedini. ¹⁵ ¿Xho ricajni dxejc? Siniab xspritä näjza xcärienä lo Dios; sol xspritä näjza xcärienä dij. ¹⁶ Palga dini gac si'c, xsprittislu calä'p xpala'n Dios con ste'ca didxsaj, niluxh bejn nani cacua-diajg di gacdi gacnäjnilu guiliä'pni xpala'n Dios, sa'csi dini gacbee xhini'c rniilu. ¹⁷ Hueencaza calä'plu xpala'n Dios, per stee bejnga dini tioob loj yälrlilajz. ¹⁸ Rudedä xquixtios lo Dios maazru rajc rniä garen-garen diidx loj guiragajctu. ¹⁹ Niluxh nejn guidoo maazru rlazä guiniä con xcärienä gaiitis diidx nani gacbeetu, nani guluii la'tu, loj tzuu mił diidx nani guiniä con xspritä ni ditu gacbee.

²⁰ Rebetzä, na'c rujntu xhigab si'cni rujn rebiuux, xcuenttis cosguijdx nanab gacnayatu si'c biuxbäz, per colyejn xhigab si'c te bengool. ²¹ Scree caj lo xleii toMoisés: “Mase guiniä lo rebejn con garenca diidx näjza xtidx benzijt, nicla si'c direni gucua-diajg xtidxä”, naj Dad baxhuaannu. ²² Ni'cni regaren-garen didxsaj najc si'c te seen lo renani gajd chalilajz xtidx Dios, et lojdi rebejn ni arililajz xtidx Dios. Niluxh yälrusule' xtidx Dios xcuent recos ni churu gac, ni'c najc te seen loj renani ahuililajz xtidx Dios, xhet lojdi renani gajd chalilajz xtidx Dios. ²³ Palga re'tu nejn guidoo dxejcti caniiu garen-garen diidx ni rut racbeedi, dxejc guidzujn tej ni di gan xtidx Dios, siniini guiraatu rajc yejctu. ²⁴ Palga re'tu nejn guidoo, dxejcti guiraatu cagusule'tu xtidx ni baniidx Dios lojtu, che jiu' tej ni di gan xtidx Dios, sacbeeni xhini'c caniiu, sacbeeni yu' xtojlni, ²⁵ sienloj rexhigab xhiga'tz ni yu' nejn lastooni, dxejcti siabrojni suzuxhijbni lo Dios, siniabni lo Dios, siniizani guliipacni suga' Dios galäiitu.

Colyejn guira'ti xnez-xnejzni

²⁶ ¿Xho ricajni naj, betzä? Che guire'tu nejn guidoo suxca' tejjatu tebgaj te salm, te xtidx Dios ni guluiini,

te diidx ni baluiloj Dios lojni, te diidx con garenca diidx, năgajcza te ni gusule' xhi săloj diidxga. Colyejn guiraa ni rujntu te tioob xcălrililajz renani ahuililajz xtidx Dios. ²⁷ Palga yu' renani rnii con garenca diidx, suguinii tio'p-chon bejn, niluxh tebgajreni, dxejcti sugusule' steeni xhi săloj ni rnii tebgajreni. ²⁸ Palga rut rajcđi gusule' rediidxga, na'c guiniireni con garenca diidx nen guidoo, suguinixtebreni lo Dios. ²⁹ Si'cza renani rusule' diidx ni rudeed Dios lojreni, suguinii tio'p-chon bejn, niluxh tebgajreni, te cuadiajg stiop xchonreni donnu la laaca caniireni. ³⁰ Palga guluiloj Dios te cos loj te bejn ni sobga' cacuadiajg, sucuedxisijcni, dxejcru suguiniini. ³¹ Sa'csi guiraatu sajz gusule'tu tebgajtu didx ni baniidx Dios lojtu te gac guisieedtu, te tioob lastoo guiraatu lo yălrililajz. ³² Rudeed Sprit Dxan xten Dios yălnajn loj reni rusule' diidx ni rudeed Dios lojreni te acanajnreni che riăjl guiniireni o che riăjl cuedxireni, ³³ sa'csi Dios najc te Dios ni rujn guira'ti xnejz-xnejzni, dini gun biejj, niluxh rbecdxini lastoo bejn nen guiraa reguidoo xten rebejn ni ahuililajzpac xtiidxni. ³⁴ Sucuedxi regunaa nen reguidoo, sa'csi di gacđi gusule' te gunaa xtidx Dios. Nanab gunreni si'c caj lo leii gunreni, gucuadiajgreni xtidx Dios ni rusule' reniguii lojreni. ³⁵ Palga rlajzreni gacbeerureni, suguiniabdiidxreni loj chăalni che guibi'reni rolizreni, sa'csi sianxtujy gunaaga palga guiniini nen guidoo.

³⁶ Colgacbee et la'ditu gulăxtiejditu rextidx Dios, luxh etza xtebtis lojtu biăadni. ³⁷ Palga yu' tejtı ni rchalo rajc rniini diidx ni rudeed Dios lojni, o palga rchaloni abadeed Xprit Dxan xten Dios te dzunro lojni, sugacbeepacni dee: guiraa rediidx ni cagucuaă lojtu, rucuaăni sa'csi si'c gunibee Jesucrist gucuaăni. ³⁸ Palga yu' chu tejtı ni di chalilajz rapă xcălrnibee Jesucrist, rutza jiudi xtiidxni.

³⁹ Ni'cni, rebetză, colyejnru te gusule'tu diidx ni runiidx

Dios lojtu, na'c gudxoĵntu renani rniiza garenca didxsaj.
 40 Luxh guira'ti nani rujntu, colyensa'cni, xnejz-xnejzni.

15

Gubansac Jesucrist lo rebengut

¹ Naj rniä lojtu betzä, colġusnaj lajztu xtidx Dios ni basule'ä lojtu, nani huililajztu, loj nani sutijptu, ² näjza colġusnaj lajztu diidx xcuent ni badzucaj Dios xtojltu che huililajztu, palga sanuu sutijptu lojni, te di xlia'si huililajztu diidxga.

³ Lojtu ganiddoo basule'ä rediidx ni sajcru ni bisiedä, basule'ä xho gujt Jesucrist lo crujz, bixe' xtiejnni te badzucajni rextojlnu, sigajc ni caj lo xtidx Dios gac. ⁴ Basule'äza xho biga'tzni, dxejc ni rion dxej guläs Diosni, gubansacni si'cni caj lo xtidx Dios gacni. ⁵ Cheni gubansacni, baluilojni lo Pedr, dxejctiru loj guitzubito'p rexejnpacni, ⁶ dxejcti baluilojni lo gabixh gaii gayuu bejn ni tre' tejsi lajt. Xhidajlreni nabansijc, niluxh yu'za reni agujt. ⁷ Dxejcti baluilojni lo Jacob, dxejctiru loj guiraa reapost.

⁸ Dxejcti lultpac baluilojzani loä, luxh alagudejd ruluilojni lo rexejnni dxejc. ⁹ Narä guxiiru sacä loj guiraa reapost, niclaza nungäjl cuälajreni narä apost sa'csi basacsä rexejn xquidoo Dios. ¹⁰ Balaslazduxh Dios narä, ni'c narä nacä si'c ni nacä naj. Luxh et xlia'di balaslajzni narä. Narä benäru dzuun loj guiraareni, niluxh xhet narädi ni benä dzuun, sa'csi xcäl_rulaslajz Dios cayacnäj narä. ¹¹ ¿Xhiru najcni palga naräni o palga laareni? Empac cagusule'nu xtidx Dios, luxh la'tu salilajztu xtiidxni.

Xho guibansac rebengut

¹² Mbaj naj, palga nuurnu cagusule'nu diidx xcuent ni gubansac Crist loj rebengut, ¿xhicuent yu'tu ni rni, xheti

yälrbansac loj rebengut? ¹³ Palga xheti yälrbansac lo rebengut, dxejc nicla Crist di nibansac lo rebengut. ¹⁴ Luxh palga di Crist nibansac loj rebengut, ¡xlia'si najc diidx nani basule'nu! ¡Xlia'siza najc xcälrlililajztu! ¹⁵ Luxh et ni'ctis. Abiga'nu sa'csi rusgueenu rniinu baspañsac Dios Jesucrist loj rebengut, luxh dini nuspañsacni loj rebengut, palga guliini di bejn guibansac loj rebengut. ¹⁶ Niluxh palga di rebengut chäs, niclaza Crist di nibansa'c lo rebengut. ¹⁷ Luxh palga di Jesucrist nibansac loj rebengut, xhet sajcdi xcälrlililajztu, sanuutistu loj xtojltu. ¹⁸ Sigajcza agunijt rebengut nani huililajz xtidx Jesucrist. ¹⁹ Palga naj ni nabajntisnu loj guedxliujre cabääznu Jesucrist, lo guiraa reben guedxliuj nuurnu najcnu rebejn ni riäj jiaduxhtej guiraa reni ruhuii loonu.

²⁰ ¡Per dini gac si'c! Guliipacni gubansac Jesucrist loj rebengut. Laani guc ganiddoo loj guiraa rebengut ni gubansac, luxh laani dini niejt par tejpas. ²¹ Sigajcni biääd yälgujt loonu xcuent tejtis niguii, sigajcza biääd yälrbansac lo rebengut loonu xcuent tejtis niguii. ²² Sigajc xcuent te niguii ni laa Adán biääd yälgujt, sigajcza xcuent Jesucrist biääd yälrbansac loj rebengut. ²³ Tejganu xcuent-xcuentnu; Jesucrist gujc ganiddoo, dxejcti guiraa reni najc rexpejn ni che jädsacni lo guedxliujre, guiraareni suspañsacni. ²⁴ Che agujc ni'c, dxejcti siääd dxe lult che gudedscacni yälrnibee lo Dios Xtadni, che abadzujlni guiraa reyälrnibee, guiraa reyälguxhtis, guiraa reyälmilagwr. ²⁵ Nungäjlpac guinibee Jesucrist cheni gunli Dios gaan loj guiraa reni rdxe'ch lojni, quixhnireni detz ni'ni. ²⁶ Lult ni rdxe'ch lojni ni gunitlojni najc yälgujt. ²⁷ Lo xquijtz Dios caj: “Agudixhni guira'ti detz ni'ni te guinibeenireni.” Che rniini si'c huenliisi gacbee bejn di gacdi guinibee Jesucrist Dios, sa'csi Dios badeed lojni xhini'c guinibeeni. ²⁸ Che acanibee Jesucrist guiraali

recos, dxejcti sudeedni guideb yälrnibee loj Xtadni Dios, te xtebtis Dios guinibee guira'tipac.

²⁹ Palga rujntu xhigab di bejn guibaṁsac loj rebengut, ¿xhi gun rebejn nani robnis xcuent rebengut? Palga di bejn guibaṁsac lo rebengut, ¿xhicuent rutiobnisreni la'tu xcuent rebengut?

³⁰ ¿Xhicuentza rdxunnu lo casionduhx guira'ti or?

³¹ Rniliápac lojtu, rebetzä, caläpä xpala'ntu xcuent Jesu-crist Xtadnu ni cayun xtzuunni lojtu. Ni'cni guniä lojtu, guira dxej rguuilreni narä te ju'treni narä. ³² Palga benä xhigab si'c te niguii guedxliuj che bacuanää reniguii ni najc si'c man nialajz lo guedx Éfeso, ¿xhi gaan benä? Palga di bejn guibaṁsac loj rebengut, do'o jien si'c ni caj lo guijt: “Do'o guidau, do'o guidun, sa'csi guixee empac sejtnu.”

³³ Na'c gusaantu gusgueereni la'tu, palga sachaaglu lo benguijdx näjza luj sajclu benguijdx. ³⁴ Basaniy xcäriejnlu si'cni nanab gunlu. Bascuääz dojl ni rujnlu sa'csi yu' balti bejn ni dipac gumbee Dios. Te guitujytu ni'c rniä diidxre lojtu.

Xho guibaṁsac rebengut

³⁵ Naj yu' reni rniabdiidx: “¿Xho rbaṁsac bejn loj rebengut? ¿Xhoza gac tiejxhreni?” ³⁶ ¿Chip nayäällu! Che rbe'clu te binij, di gäjł guiliejn palga di xhobga guet, nalajznu, palga dini guechduu. ³⁷ Luxh che rbe'clu, dilu cue'c gäjłga si'cni rlajzlu gacni, alga rbe'clu xhob o triuu o ste'ca binij, ³⁸ niluxh Dios rujn rliejnni, rustioobni gäjłga, lo tejga gäjł rudeedni xpalajgni o tiejxhni, si'ctis ni rlajzni. ³⁹ Xhet guiraadi retiejxhreni najc tebloj. Yu' bääł xten bejn, yu'za bääł xten reguidxaa, yu'za bääł xten reman xh-aguibaa, yu'za bääł xten rebäjł. ⁴⁰ Sigajcza yu' tiejxh rebajł

xhaguibaa, tiejxh rexten guedxliujre. Niluxh yälrdimbicha' xten rebajl xhaguibaa najc tej, dxejc yälrdimbicha' guedxliuj najc ste'ca. ⁴¹ Bicha' xte gubijdx najc garen lo xten bäii, sigajcza xpicha' rebal xhaguibaa najc garen-garenza lo sa'reni. ⁴² Sigajcza yälrbansac loj rebengut; che guet bejn rga'tz tiejxhni luxh rujdxni, rnitlojni. Luxh che guibansacni loj rebengut, garenca gac tiejxhni, diruni gudx, anabajni par tejpas. ⁴³ Che rga'tzni, rujn bejn xhigab xhetru gacnäjdi tiejxhga, niluxh che guibansacni, lacti sacru, lacti sajc tiejxhga. Che rga'tzni, xhetru sajcdi gunni, luxh che guibansacni, anadipduxhni. ⁴⁴ Che rga'tz tiejxhnu, najcni xten guedxliujre, luxh che chäsni najcni te tiexhcoob ni runiidx Dios. Ni'cni yu' te tiejxhni ni siääd lo guedxliuj, yu'za te tiejxhni ni siääd xhaguibaa.

⁴⁵ Si'cza caj lo xtidx Dios: “Nigui galooga ni laa Adán, bejn Dios gujcnj te bejn nabajñ.” Niluxh Adán ni biääd lult, Jesucrist najc Sprit ni runiidx yäl'nabancuob loonu. ⁴⁶ Ganid najc yäl'nabajñ xten guedxliujre, dxejctiru yu' te yäl'nabancuob xhaguibaali. ⁴⁷ Sigajcza niguii galooga najc bejn guedxliujre, niluxh ni rojp niguii ni biääd najc bejn xhaguibaali. ⁴⁸ Benchee Dios Adán con yuj, najcni bejn guedxliuj. Xhaguibaali biääd Jesucrist, najcni bejn xhaguibaa. ⁴⁹ Sigajcni najcnu si'c bejn guedxliujre, sigajcza sajcnu sigajc najc bejn ni yu' xhaguibaa.

⁵⁰ Naj guiniä rediidxre lojtu betzä, di gac ted tiejxhnu ni najc bääl näjza rejn xhaguibaa cadro yu' Dios. Tiejxhnure nani sinitloj di gacdiza xca'ni stee tiejxh ni najc par tejpas. ⁵¹ ¡Colhuii! Rlazäza gacbeetu te didx-xhiga'tz; xhet guiraadinu guet, niluxh sidxaa guiraa retiejxhnu ⁵² tera't bälzule', si'c cheni rdinya' guzii, che jiel lult trompe't, dxejc sibansac rebengut, säjsreni guideb tiexhcoobreni ni najc par tejpas. Luxh näjza tiejxhnu sidxaa. ⁵³ Sa'csi tiejxhnu ni najc xten guedxliuj nanab guidxaani te ga'pnu

tiejxhnu ni najc xten xhaguibaa, sa'csi tiejxhnu ni najc xten guedxliuj rejtnei, niluxh tiejxhnu ni najc xten xhaguibaa di gacdi guetnei, najcni par tejpas. ⁵⁴ Niluxh che tiejxhnu ni najc xten guedxliuj abidxaa te ga'pnu tiejxhnu ni najc xten xhaguibaa, näjza che tiejxhnu ni sajc guet abidxaa te ga'pnu tiejxhnu ni di gacdi guet, ni najc par tejpas, dxejc sisiojb xtidx Dios ni caj scree: “Yälgujt agunitloj sa'csi bejn Jesucrist gaan lojni. ⁵⁵ Yälgujt, ¿xho gac gunlu gaan naj, ä? Yälgujt, ¿Con xcälñayanlu naj, ä?” ⁵⁶ Xcälñayan xten yälgujt najc dojl. Xcälñabee dojl najc leii. ⁵⁷ Niluxh rdeednu xquixtios lo Dios, nani runiidx te yälñabee loonu te jiennu gaan lo yälgujt xcuent Dad Jesucrist.

⁵⁸ Ni'cni rebetzä ni sanälazduxhä, colchanuutis, colsudzu'tz lo xtidx Dios, na'c guidxajgtu guntu xtzuumni, sa'csi anancheetu xhet xlia'di najc dzuun ni runiidx Dios riennu.

16

Meel ni guire' par rexpejn Dios

¹ Xcuent meel nani guire' par rebejtznu, colyejnni sigajcni räpä gun reben rexquidoo Galacia. ² Casob dumingw, nalajznu ganid dxej xmaan, tejgatu colcuää te meel yejc nani rujntu gaan nen te xmaan, colcucheeni, te na'c gutie'tu meel che jiälä. ³ Te che guidzunä, guxhalä meelga, näjza tiop-chon guijt chanä chutis bejn ni cuetu chasa'nni guedx Jerusalén. ⁴ Palga laaca cha'aza, sajcza chänäreni narä.

Xhigab ni bejn Pabl chääni biäj

⁵ Guidzunä lojtu che agudedä reguedx Macedonia, sa'csi sidedä nejzga galoo ni jiälä ro'c. ⁶ Dxejcti pet siannää la'tu, pet saclaä, sidedä guiraa rebäi najl ro'c, te gacnäjtu narä che cha'a cadrotis cha'a. ⁷ Sa'csi di rlazä

jiädhuiätu te ladejtzsi, rlazä jiannää la'tu xchejpac, palga gusaan Dad Jesucrist gunä si'c. ⁸ Niluxh sia'nä guedx Éfeso, te ro'c tedä lanij ni rusnaj lajz bejn che biääd Sprit Dxan xten Dios. ⁹ Sa'csi ro'c yu' xhidajl bejn nani rlajz guisieed xtidx Dios, niluxh ro'c yu'za xhidajl reni rdxe'ch loä.

¹⁰ Palga guidzujn Timoteu lojtu, saru colhuiini, te na'c chuni yärsia' laḷ ni yunäjni la'tu, sa'csi cayujnni xtzuun Dios sigajc runä narä. ¹¹ Na'c gusaantu chu tej ni cuälazni, colcuedcx lajzni, dxejc colgusunejzni, te jiädhuiini narä ree, sa'csi ree cabäaznu laani con rebejtznu.

¹² Niluxh xcuent bejtznu Apolos, räpäza lojni niääd-pacni lojtu con rebejtznu, niluxh di rlajzpacni niäädni naj. Per siäädcani dxejtis ni gac jiäädni.

Rextixtios lult ni ruxhalni

¹³ Col̄susin, col̄sudzu'tz lo yäl̄rililajz xten Dios, col̄yejn dzuun si'c niguii, col̄yajc ben̄daan. ¹⁴ Xhitis ni rujntu col̄yejn̄ni con yäl̄rinälajz.

¹⁵ La'tu rebetzä, anajntu xcuent rexfamil̄ Estéfan̄as, nani ganid huililajz xtidx Dios nez reguedx Acaya, najntu xho racnäduxh̄reni rebejtznu nani huililajz xtidx Dios ro'c. Naj rniabduxhä lojtu, ¹⁶ colgusoob xtidx rebejn̄ga, näjza xtidx guiraa rebejn̄ ni racnä j rexpejn̄ Dios, ni rujnza xtzuun Dios. ¹⁷ Rbalazä bidzujn̄ Estéfan̄as, näjza Fortunato, näjza Acaico, sa'csi laareni bejn̄reni par narä nani di niajcdi niujntu sa'csi rutitu. ¹⁸ Gulecdxireni lazä näjza lajztu, ni'cni, jcol̄jiu sa' rebejn̄ga!

¹⁹ Rebejn̄ xquidoo Dios nez reguedx Asia ruxhal̄ xtixtios lojtu. Aquila näjza chääl̄ni Priscila näjza rebejn̄ ni re' roliz̄reni ruxhal̄zareni xtixtios lojtu. ²⁰ Guiraa rebejtznu ruxhal̄ xtixtios lojtu. Col̄guinii tejgatu lo sa'tu: “Xchan, gacnä j Dios la'tu.”

²¹ Narä Pabl, ruxhalä xtixtios lojtu, lagajc narä benä reletre.

²² Palga yu' chu tejtü ni di chanälajz Dad Jesucrist, sunitlojni. ¡Dad Jesucrist, guda!

²³ Gacnäj xcälruulaslajz Jesucrist guiraatu. ²⁴ Yälrinälajz ni rapä xcuent Jesucrist suchunäjni la'tu. Sugacni si'c.

Xtidxcoob Dios ni biädnä dad Jesucrist **New Testament in Zapotec, Mitla (MX:zaw:Zapotec, Mitla)**

copyright © 2006 Wycliffe Bible Translators, Inc.

Language: Zapotec, Mitla

Translation by: Wycliffe Bible Translators, Inc.

Zapoteco, Mitla [zaw], Mexico

Copyright Information

© 2006, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Zapotec, Mitla

© 2006, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 27 Jul 2022 from source files dated 28 Jun 2022

5cff1274-8dc3-5398-a94d-f6033bb363c9